

**Najib Umum Kenaikan Pangkat Perenang Rentasi Selat Inggeris
Bernama
11 Oktober, 2012**

KUALA LUMPUR, 11 Okt (Bernama) -- Perdana Menteri Datuk Seri Najib Tun Razak Khamis mengumumkan kenaikan pangkat semua tujuh perenang Ekspedisi Renangan Perpaduan Selat Inggeris 1Malaysia (RPSI1M) atas kejayaan mereka melaksanakan cabaran itu baru-baru ini.

Beliau turut mengumumkan pemberian insentif wang tunai berjumlah RM120,000 kepada mereka serta tujuh perenang simpanan yang merupakan anggota Angkatan Tentera Malaysia (ATM), dan seorang jurulatih.

"Bagi perenang solo, kita setuju berikan RM20,000. Perenang lain RM10,000 seorang. Pasukan simpanan dan jurulatih RM5,000 seorang," katanya ketika berucap pada majlis penghargaan dan jamuan tengah hari bersama peserta ekspedisi itu di Dewan Bankuet Parlimen di sini.

Tujuh perenang itu ialah perenang solo Laskar Kelas Satu PAP (PKL) Estino Taniyu, serta perenang berganti-ganti Laskar Kelas Satu PAP (PKL) Mohd Roslan Mohd Zawawi, Kaptenb Mohd Khairul Faizal Mazli, Sarjan Udara Mohd Salleh Mahmor, Kapten Buranurdin Sali, Koperal (U) Shahrizal Omar dan Trooper Mohd Zulfadhli Mahamad.

Najib berkata kejayaan ekspedisi itu merentasi Selat Inggeris dari Dover di United Kingdom ke Calais di Perancis merupakan pengiktirafan kepada negara dan ATM sendiri.

Insentif kewangan itu merupakan sumbangan Yayasan 1Malaysia Development Berhad.

Najib berkata beliau kagum dengan kejayaan pasukan itu meskipun berhadapan dengan pelbagai dugaan termasuk faktor cuaca, suhu air dan keadaan laut bergelora.

"Bagi mereka yang tiada semangat, kecekalan dan daya saing luar biasa, saya tak fikir mereka boleh hadapi rintangan. Sebab itu perlukan kekuatan fizikal, rohani, minda yang luar biasa dan kejayaan mereka sangat dihargai oleh kerajaan dan rakyat Malaysia," katanya.

Justeru, Najib berkata anggota pasukan itu layak menerima insentif yang diumumkan hari ini, dan berharap kejayaan mereka menjadi dorongan dan inspirasi kepada seluruh rakyat Malaysia.

Dalam pada itu, Estino ketika ditemui pemberita berkata beliau gembira dengan pengumuman Perdana Menteri namun menegaskan beliau tidak menyertai ekspedisi tersebut untuk mengejar ganjaran.

Beliau berkata wang insentif itu akan digunakan untuk melangsungkan perkahwinan yang ditangguh demi memenuhi objektif ekspedisi berkenaan.

Turut hadir Menteri Pertahanan Datuk Seri Dr Ahmad Zahid Hamidi.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=701255>